

Tambahan 100 kakitangan percepatkan proses tuntutan harta pusaka

Samadi Ahmad



Putrajaya: Tambahan 100 kakitangan secara kontrak dan pelaksanaan Sistem e-Tanah secara menyeluruh di seluruh negara akan dapat membantu mempercepatkan proses tuntutan pembahagian harta pusaka.

Timbalan Menteri Tenaga dan Sumber Asli (KeTSA), Datuk Ali Biju, berkata ketika ini Jabatan Ketua Pengarah Tanah dan Galian Persekutuan (JKPTG) berhadapan dengan 72,348 tunggakan kes sedia ada susulan pandemik COVID-19.

Semua kes ini dijangka diselesaikan hingga penghujung tahun ini dan kebiasaan setiap kes mengambil masa empat bulan untuk diselesaikan.

Katanya, 100 kakitangan kontrak secara lantikan selama tiga tahun ini sebahagiannya Gred N41 dan N19 dijangka memulakan tugas sebelum hujung tahun ini sebagai penyelesaian jangka pendek bagi menangani kes pembahagian pusaka.

"Kakitangan lantikan secara kontrak ini akan ditempatkan di negeri-negeri yang mempunyai kes tuntutan tinggi seperti Kedah, Selangor dan Johor," katanya pada Majlis Perasmian Persidangan Pentadbiran Tanah sempena Hari Tanah Negara ke-6 2022.

Yang turut hadir Ketua Setiausaha KeTSA, Datuk Rosli Isa dan Timbalan Ketua Pengarah JKPTG (Sektor Kemajuan Pengurusan Perundangan).

Sistem e-Tanah mula dilaksanakan di Wilayah Persekutuan Kuala Lumpur pada 2017 dan kerajaan memutuskan memperluaskannya secara kerjasama sektor awam dan swasta ke tujuh negeri lain dalam masa terdekat.

Ali berkata, sistem ini dibangunkan di Perak, Putrajaya dan Labuan serta akan diperluaskan ke negeri-negeri lain yang dijangka diguna pakai pada 2024.

-Berita Harian